

國

朝

列

卿

紀

國朝列卿紀卷之四十五

南京禮部侍郎年表

師

達

山東東阿人監生永樂二十年以吏部右侍郎署印

胡

濬

南直武進人進士洪熙元年任左

吳廷用

福建政和人進士宣德九年任左理部事正統元年丁憂

陳

璉

廣東東莞人鄉舉正統元年任左掌部事五年致仕

吾

紳

浙江開化人進士正統五年任右六年卒于官

趙

新

浙江富陽人鄉舉正統六年由南京吏部右侍郎改本部掌印

金

問

南直吳縣人以楷書薦正統九年任右掌部事十二年卒于官

杜

寧

浙江天台人進士正統十四年任右

姚夔

浙江桐廬人進士
景泰三年任右

龔永吉

浙江義烏人鄉舉天順元年
任右本年調南京大理寺卿

許彬

山東寧陽人進士歷內閣禮部右侍郎兼
學士天順元年調任右本年降陝西叅政

章綸

浙江樂清人進士天順元
年任右四年改南吏右

廖莊

江西吉水人進士
天順五年任右

俞綱

浙江嘉善人應天上元籍正統元年由
生員舉天順七年任左成化三年致仕

倪謙

詳本部尚書成化三年任
右四年劾免五年復任

章綸

詳前成化丑年任左十年丁憂十
二年致仕卒贈南禮尚書諡恭毅

李本

詳本部尚書成化十二
年任右十三年掌部事

尹直

江西泰和人進士
成化二十年任左

儀

瓚

直隸雄縣人進士成化二十二年任右

萬

翼四川眉州人進士成化二十三年署本部事

徐瓊

江西金谿人進士弘治三年任右

董越

江西寧都人進士弘治六年任右

季傑

直隸常熟人進士弘治十三年任右

馬廷用

四川西充人進士弘治十五年任右正德四年致仕卒贈南禮尚書

劉忠

見本部尚書正德二年任左

王綸

山東濱州人進士正德四年任右本年調都察院右副都御史巡撫大同

常麟

浙江嘉善人進士正德四年任右六年降山西叅政尋閑住

吳儼

詳本部尚書正德六年任右

楊

旦

福建建安人進士
正德七年任右

楊

廉

詳本部尚書正
德十年任右

王

瓚

浙江永嘉人進士歷禮部左正德十六年調
南京禮部左嘉靖元年丁憂卒贈禮部尚書

汪

偉

江西弋陽人進士
嘉靖元年任右

劉

瑞

四川內江人進士嘉靖二年任右
三年致仕卒贈南京禮部尚書

趙

永

南直臨淮人長陵衛籍進士
嘉靖三年任右六年致仕

顧

清

詳本部尚書嘉靖六年由
禮部右侍郎開任起右

黃

綰

浙江黃巖人官生
嘉靖八年任右

林

文俊

福建莆田人進士
嘉靖十三年任右

費

采

江西鉛山人進士
嘉靖十四年任右

呂 構

陝西高陵人狀元嘉靖十五年任右十八年致仕

崔 銳

河南安陽人進士嘉靖十八年任右二十年致仕卒贈南京禮部尚書諡文敏

瞿 桐

南直海門人正德丁丑進士嘉靖二十年任右二十一年丁憂

徐 問

南直武進人弘治壬戌進士嘉靖二十一年任右

康 夫和

福建莆田人嘉靖乙未進士三十三年任右

林廷機

福建閩縣人嘉靖乙未進士四十年任右

裴 宇

山西澤州人嘉靖辛丑進士四十二年任右

陳 陞

浙江餘姚人嘉靖辛丑進士四十年任左丁憂隆慶元年任左卒

呂調陽

廣西臨桂人嘉靖庚戌進士隆慶元年任右二年改北

孫 鋌

浙江餘姚人嘉靖癸丑進士隆慶四年任右

萬浩

江西進賢人嘉靖癸丑進士
隆慶五年任右掌國子監事

汪鏜

浙江鄞縣人嘉靖丁未進士隆
慶六年任右掌國子監

劉士和

直隸宜興人嘉靖辛丑進
士隆慶六年起左掌南監

董傳策

直隸上海人嘉靖庚戌
進士萬曆元年任右

殷邁

南京甯南人嘉靖
辛丑進士萬曆二年任

羅萬化

浙江會稽人隆慶戊辰狀元萬曆十二
年以國子監祭酒陞任十四年丁憂

韓世能

直隸長洲人隆慶戊辰進士
萬曆十四年任十五年丁憂

李長春

四川富順人嘉靖湖廣公安人隆慶戊辰
進士萬曆十六年由南工部改任

趙用賢

直隸常熟人隆慶辛未進士萬曆十
七年由南祭酒陞任十八年改北

劉元震

直隸任丘人隆慶辛未進士萬
曆十八年由國子祭酒陞任

南京禮部侍郎行實

師達字九達山東兗州府東阿縣人由縣學貢入國子生洪武二十五年擢監察御史革除中陞陝西按察使丁母憂去壬午召爲兵部右侍郎轉吏部右侍郎永樂四年營北京宮殿命採木湖廣七年征虜命達總督餽運建議請軍量其程置堡使更遞轉輸則民不困乏而軍得足食從之十四年命督修漢府二十年命署南京禮部事二十二年陞南京戶部尚書詳南京戶部

胡濙字源潔直隸武進人洪武庚辰進士授兵科給事中尋遷右給事中永樂改元秋以奏對稱旨遷戶科都給事中丁亥

上察近侍中特深老實可託遂命巡遊天下以訪異人爲名實察人心向背丙申秋還朝丁內艱乞終制不允特陞禮部侍郎吏部奏禮部左右侍郎俱缺遂遷左侍郎十六年往巡江浙諸郡授嘉議大夫癸卯復自均襄還朝車駕駐蹕宣府馳謁行在上慰勞之曰卿驅馳良苦賜坐與說凡所歷山川道里郡邑豐嗇民情休戚以至所聞所見保國安民之事悉爲陳說上忻然納之向所疑慮者至是皆釋然比退漏下四鼓仁宗嗣位特賜誥命授正議大夫資治尹已而聞有密疏疑之乃轉太子賓客兼國子祭酒之官南京未幾閱章奏見所上密疏深嘉其忠方議重用之而龍馭上賓宣宗卽位復禮部左侍郎兼職如

故洪熙乙巳冬自南京來朝 上素重之及入見顧問良久卽
畱任行在禮部宣德改元春進尚書詳禮部

吳廷用字

福建建寧府政和縣人永樂甲申進士授戶科

給事中與修性理四書大全等書二十二年陞雲南僉事陞辭
乞歸省親 上曰爾居侍從幾二十年謹厚小心宜在朕左右
洪熙元年以內閣楊榮薦陞行在刑部右侍郎而令歸省在任
不能持正阿比權勢時大理少卿戈謙言事過直廷用與呂震
吳中劉觀交奏其賣直沽名 上後知之鄙其阿徇宣德九年
陞行在禮部左侍郎理畱都禮部事正統元年歸省丁憂卒於
家性通敏有幹才但阿徇爲清議所薄云爾

陳璉字廷器廣東廣州府東莞縣人自幼聰敏喜學從邑庠訓導黃先生勸受書經學成領薦會試不偶入太學選爲桂林府學教授嚴條約以身先之時有詔武臣子弟皆就學公日進諸生講聖賢之道所謂忠孝仁義之說必使身體而力行之諸生雖文武不同莫不皆有所得都督韓觀總兵鎮守廣西猛悍不下士聞其教心悅誠服每以儒師加禮秩滿陞國子助教永樂初近臣言璉有治才不宜置之散地召試在優等擢知許州始至人以儒者易之及璉少有警發衆悚懼乃更以寬厚寧民未幾代還改滁州均徭賦時征斂禁奸戢暴民用太和 太宗皇帝巡幸北京所過先遣廷臣察吏治問民隱治有異效者加

陞擢衆皆言其績最滁人恐失之詣闕乞留遂陞揚州知府
掌滁州事 賜綺衣一襲鈔五百貫禮部宴餞給驛遣還在滁
又九年陞四川按察使滁人祀之醉翁亭與王禹偁歐陽修稱
三賢云四川去京遠民不畏法豪吏黠胥奸弊百出則一治以
法不少貸軍中暴橫有號虎彪太歲者莫敢犯犯輒受其禍乃
爲設方略密遣人捕之皆置之重典而人以寧乃建言修武備
慎刑法明禮制復義倉正風俗等九事 上嘉納之二十二年
召還改南京通政使出納命令罔不見允 上喜其盡職賜之
誥命以示褒宣德元年命掌國子監事璉儒者持憲非其所長
上憶璉在永樂時嘗獻歌頌有文名旣命之顧寒義曰向所用非

所長今其庶幾乎然師表亦不易也本年丁憂正統元年陞調南京禮部左侍郎於稽古禮文之事尤惓惓不少懈又五年以年踰七十致仕璉德行淳懿文詞重與人愛之若拱壁其所進於上有經符頌平胡頌饒歌鼓吹天下傳頌之縉紳士大夫求碑銘序記詩賦諸作以發德述懷娛情寫物者足相躡於門應之如響故所作最多今傳者有琴軒集歸田稿若干卷尤好著書凡所臨郡邑必采其山川人事風俗物產所以供賦稅之正而適上下之宜者爲書以傳若潁川永陽羅浮成都等誌皆具存其識鑑精明取舍不妄賓興之歲必在主司之列有得人
之譽及致仕而歸鄉之學者有所增益郡縣守令政有未達者

得容度於...作亂其所以制禦緩靖卒保無恙者其策
爲多以景泰甲戌十月十六日終年八十五

滁志云公以才聞調滁是時天下初定生息未久百務草創士
不知方公專務德化務在休養不純用刑威又時時修起敝廢
自城池學舍壇壝祠宇靡不繕治完好而民不知勞惟務節上
而羨下爲學者指授爲文修己之要當時之士靡然發動有稱
鄉先生魏忠之廉於公者公曰何如曰忠於俸財取給餘悉籍
還官公曰斯亦賢者之過矣且子不聞仲尼之訓原思乎九年
秩滿吏民守閭乞留陞揚州知府...事治爲江北諸郡第一
吾紳字叔縉浙江衢州府開化人聰明過人讀書經目輒記自

邑庠生登永樂二年進士第 成祖文皇帝選入翰林俾緝學

中秘其時同被選者曾子榮而下二十有九人紳年最少面白

皙眉目聳秀言論剛直文詞峻潔而學問日益進衆皆敬憚之

九年除刑部主事十六年陞郎中十八年陞行在禮部右侍郎

命初下 文皇帝顧謂尚書呂震曰此朕昔所造就今日得人用

矣於是時六卿以下皆走賀於其家紳一室蕭然罔有治具惟

再進茗啜而已司寇金公曰叔繹欲學向敏中耶衆皆笑而起

明年以奏對忤 上旨俾出叅政廣東宣德四年復入爲行在

禮部右侍郎明年改任南京刑部 命考福建藩臬郡縣諸司

是官存黜之允愜輿論正統五年復任南京禮部右侍郎紳寔

事四朝敷歷中外始終幾四十年清白一心守正不阿陞黜遷改不矜寵辱秉禮不煩持法公恕政務之集雖杯酒笑談之中灑灑落落不費措置故兩京縉紳皆重之六年秋紳新奉朝命主祀先師孔子未幾日而得疾遂不起年五十九

趙新字日新浙江杭州府富陽縣人永樂乙酉領浙江鄉薦入國子監永樂十一年十月與脩永樂大典除工部屯田司主事二十一年陞吏部稽勲司郎中宣德五年江西稅糧逋負尚書蹇義薦新爲吏部侍郎奉勅巡撫江西討平蠻寇新察吏治詢民瘼又議以漕淮之舟順載江西之粟兵農兩利其他耕獲以時征斂立約運輸簡便浮費盡蠲少師楊文貞文敏等各賦

詩記贈正統四年調南京吏部六年調南京禮部右侍郎時尚書省革新掌部事一切禮文學校俱裁處有方詳淮南巡撫

金問字公疏直隸蘇州府吳縣人受易俞 木家貧無書從人

借讀無不通解永樂二年被薦爲司經局正字十二年宮僚多

得罪問亦坐繫獄十年非義相餽皆不受時黃淮楊溥同坐繫

三人相得甚懽省躬念咎之暇各持一經講論曰此處憂患之

道也洪熙初釋繫 命待詔思善門制授翰林修撰備顧問論

時政之得失悉見獎納元年陞侍講學士宣德十年擢太常寺

少卿兼翰林侍讀學士正統九年調南京禮部右侍郎十二年

卒於官問文行敦茂義聞流著平生閱復否泰相尋而不變所

操製述雅健精采燁然善書律魏晉筆法星曆之學尤精然未嘗以語人有集若干卷

縣箚所探云吾鄉禮部侍郎金公問在仁廟時常賜歐陽居士集二十本寶藏之既而所居不戒於火公忘護持已失八本後宣廟在文華殿公被顧問因從容言賜書事宣廟促令內侍爲補之踰數日得賜八本雖紙色不同而兩朝恩賜復歸於完蓋殊遇也

杜寧字元浙江台州天台縣人宣德丁未進士第二授翰林編修正統三年陞侍講十四年命主考會試時岳正卷被同考誤寘落卷寧見之曰此我輩中人遂擢第一及廷試賜進士及

第後入關以直節振世人服其有知人之明十四年陞南京禮部右侍郎景泰元年改南京兵部右侍郎餘詳南京兵部

姚夔字大章浙江嚴州府桐廬縣人正統壬戌進士擢吏科給事中歷南京刑部右侍郎景泰三年改南京禮部奉勅考察

雲南官吏黜陟允當四年還朝遂留禮部天順丁丑英宗

復位石亨輩竊弄威權勢焰可畏夔視之如常亨憾其不附已

乘間調夔南京禮部英宗素知夔爲人且聞正月立儲之議

未幾驛召至京賜二品服轉禮部左侍郎詳吏部

龔永吉字天民浙江金華府義烏人叔安戶科給事中永吉三歲失怙母夫人躬鞠育之見其秀異私喜謂龔有後祖母傅氏

亦鍾愛之甫七歲遣就外傳以次就小學四書九經讀之輒成誦諳悟大義言動進止如老成人識者咸謂其器度凝遠成童選充邑庠弟子負業春秋夙夜研究得筆削褒貶之旨兼通諸子百家善楷書得鍾王妙法文章爲本於程朱布帛菽粟之意絕去穿鑿附會之說朋輩多讓之領庚子浙闈鄉薦會試中乙榜不就入太學學行重六館宣德丙午夏四月授兵部職方司主事清慎有政聲秋八月扈駕征樂安二年丁未春會試掌卷三年戊申夏六月司內外武官誥勅謄黃事竣賜布絹楮幣有差五年冬十一月有湖廣調軍之役檄往治帖然衆服兵部尚書王驥極口稱賞以爲得人六年辛亥夏聞祖母夫人

訃歸承重守制起復十年乙卯春二月 英宗皇帝登極 賜
白金絹幣有差正統改元丙辰春二月陞武選司郎中秋九月
被誣謫戍平涼皆抱不平吉處之裕如也二年丁巳春二月鞞
虜犯邊 朝廷用人禦侮兵部尚書王公薦其可用 詔驛取
之時副總兵都督趙安兵部侍郎柴車奉 命將兵出涼州而
以永吉爲佐軍行過海子赤林渡流沙抵鉄門關逐北戰捷執
馘而還其籌策居多夏六月復職當在平涼時母夫人傅氏歿
於家逾三年弗及丁憂旣復職乃以其事 聞欲還終喪事不
許九年甲子 詔靖遠伯兼兵部尚書王公驥南討麓川緬甸
西巡延綏寧夏莊涼甘肅等處而以吉爲佐其所歷遠近險易

關隘無不周知且便宜行事其才益著智勇之士見之莫不服
讓旣奏功衆多靖遠之知人十年乙丑秋奏還祭掃 賜幣楮
二千貫十四年己巳夏五月 詔靖遠伯將兵往麓川緬甸孟
養等處征勦苗蠻經畫一委於永吉運籌決勝叅贊惟勤用是
負固不服者莫不望風降附班師還京論功行賞其勞爲多冬
十月擢大理寺少卿景泰辛未夏四月 賜誥命中順大夫天
順改元春三月陞兵部右侍郎是年六月轉南京禮部秋八月
調南京大理寺卿成化二年致仕見南京大理寺
許彬山東兗州府寧陽縣人永樂乙未進士天順元年入閣後
調南京禮部侍郎尋謫陝西叅政詳內閣

章綸字大經浙江温州府樂清縣人中正統戊午鄉薦明年會試第三人廷試賜進士出身授南京禮部主事景泰元年陞禮部儀制司郎中適國家多故綸知無不言言無不盡首稱增會試取士額次言太平十八事累數千言俱准擬行北虜也先索使通好綸言宜暫結來往之盟以待天時人事之宜車駕欲幸大隆福寺綸言以萬乘之尊臨異端之地傳之後世誠非美事又因災異請下詔求致災之由上示撤樂減膳之敬下推捐俸救荒之仁節濫賜之費罷補官之俸愼差遣之擾備義倉汰僧徒諸事皆剴切初景泰元年英宗皇帝歸自北狩尊爲太上皇別居南宮憲宗已在儲位又明年乃易兩宮疎隔嫌

隙滋萌災異薦臻人心恐懼無敢以言者綸特陳修德弭災十
四事一畏天戒二任燮理三養聖躬四節幸御五務儉約六
勤論政七惇孝義八慎賞賚九重名爵十革巡撫十一擇重臣
十二辨異端十三却貢獻十四汰冗員其畏天戒大意謂內臣
不可干外政佞臣不可假威福後宮不宜盛聲色凡爲陰盛之
類請悉革罷其惇孝義則謂上聖皇太后爲天下母受天下
養可謂尊之至矣然必躬修視膳問安之禮乃盡尊養之誠

太上皇帝君臨天下十有四年陛下向嘗親受冊封爲臣子是
天下之父也至是以天位授陛下尊爲太上皇是天下之
至尊也每月朔望及歲時節旦宜率羣臣朝見於延安門以極

尊崇之道又復舊 皇后於中宮以正天下之母儀復舊
儲於東宮以定天下之大本如此則倫誼篤而和氣充天意自
回災異自弭矣疏上忤 旨下錦衣衛獄刑逼誣引大臣并
南宮通謀榜掠慘酷體無完膚濱歿者數卒無一語及他惟御史
鍾同先嘗有言故并逮之俱欲重坐會天大風雨黃氣四塞刑
乃少緩明年秋大理寺少卿廖莊入 朝亦以嘗請復儲杖於
闕廷因命杖繯與同至百同死綸幾絕復生禁錮愈嚴綸了無懣
悔意越二載 英宗復登寶位 憲宗還正儲宮首錄綸忠出
之獄嘉嘆良深遂陞禮部右侍郎一時日王公而下至里兒巷
婦皆嘖嘖歎頌不容口曰天祐忠義何若是其較然也其後佐

禮部益侃侃不回天順二年山東水災守臣請蠲租未允綸爲
請得減其半宗室有被火盜乞賑卹該司沮以無例綸言朝
廷重親親宜出特恩遂賜金五百兩會南京禮部缺卿佐石亨
楊善忌綸陽薦於上實疎之也上面諭曰根本重地非卿
不可事有當言具以來聞賜白金二十兩文綺二表裏以行
四年調南京吏部八年憲宗嗣位有司奉遺詔百日常請
行大婚禮綸言山陵尚新元朔未改百日從吉心實不安釋服
公除在前代固有常例諒陰婚娶於今日不忍隨宜乞特諭
禮部來春舉行時雖迂其言識者韙之成化紀元又陳救荒四
事四年奉詔考察南京官吏與都御史高明議不協遂劾之

并斥御史部屬數十人五年以星變求退位不許尋陞南京禮部左侍郎六年告歸展省逾歲還任丁母夫人包氏憂將起復遂乞休致上許之家居創祀先祠及校定時祀拜謁儀節居家雜儀爲子孫規宅西構重居以皮圖籍日坐其上觀書覽勝東構小軒假嶼西泉石時從賓客觴咏其中給事常得拜慶稱壽姻戚咸集綸極飲大醉歌吟笑呼甚樂也十九年以疾終先是宅前山岩崩摧聲振谷綸嘆曰吾其當之歟至是果然卒贈南京禮部尚書諡恭毅

學士尹直云正統之末社稷非景帝未知如何一時安攘之功卓矣所不趁者易儲一事耳使當時廷臣有能直諫以身

御之則儲未必易後有繼綸連章僉評必從乃已則可必復正
月十七日之變亦何自有萌奈何獨綸憤發一言遂罹楚毒豈
意生全復躋顯位以功名考終而榮及後人忠義之報何如哉
蓋綸孝友朴淳剛方坦易學問浹洽遇事敢言然皆正教大體
匪訐匪誣厥後景帝拒絕間言全護兩宮其亦終有悟於
綸之言也夫彼棘蠅市虎權鷹犬之輩徒猥瑣細故而於宗
社安危綱常淪斃略不語及者皆綸之罪人也漢汲長孺之剛
直宋魯宗道之骨鯁杜祁公之勁氣直節以綸方之亦奚覩哉
春秋有大美惡不厭其詞重復肆余於綸忠讜始終言之其他
如文與行有過人者皆可略

尚書謝鐸誌云初御史鍾同亦上言令諸司各陳所以致災者因以復儲事諷禮部老臣

縮不敢對曰作死作死公疏方

具奮曰我復不言誰當言者遂言之至是并逮同天順初首詔釋公檢公疏無所得內臣有能舉以誦者上擊節嘆賞鐸成化初被旨入檢先皇帝實錄見公景泰中論復儲下獄事輒嘆息泣下曰公疏動萬言而一不之載何以示天下後世亟持以告總裁官學士劉文安公公曰諸臣奏疏凡畱中者例不得書鐸曰天下事孰有大於此者此而不書將奚書公盍上其事增入之公憮然曰業已成無益也鐸至今未嘗不以爲恨

侍郎儲巖云景泰壬申茂陵徙封沂王公時爲禮部郎中履

進言不恤至復儲事尤剴切當是時元臣故老猶多在位喋無
一語獨公以死爭 帝怒寘公獄濱死或者謂 帝意他有所
在故罪公特甚是蓋不然公所言觸犯忌諱者多矣 帝於此
特遲留不卽處分耳懷愍旣薨 帝繼未有嗣舍故太子不立
而誰立乎此理勢之必然者異時 茂陵首詔復帝舊號且追
當時權臣不已 帝之意至是益彰矣嗚呼公之言惜不盡用
也使早用之 兩宮旣睦羣志翕然定之豈有他日多故哉天
下事安危倚伏蓋相因特無人先言之并聽之者爾幸亦有言
者而君子獨小人衆又罔以共厥功覽公之傳益壯其事而悲
其意後世考公論列者尚知所繫之大如此云

尚書邵二泉云寶嘗論名臣於正統景泰間劉忠愍敦君臣之大義章恭毅明國家之大紀于肅愍建社稷之大功皆所謂願爲執鞭而不可得者

廖莊字安止江西吉安府吉水縣人宣德五年進士八年選工科給事中十年擢刑科給事中正統六年陝右饑命往賑之率以便宜從事賴以全活甚衆比還多所建白八年大理寺官屬悉以事坐累命署寺事逾月權南京大理寺左寺丞十一年陞南京大理寺左少卿景泰五年上疏請朝謁南宮及加恩禮於憲廟大意謂上皇臨居南內問安侍養大聞曠闕且上皇之子猶子也宜令親近儒臣講明經義輔成德器而端國

家之本以係天下之心由是忤 旨留中不出明年丁母憂入
見 命挺於廷幾死明日謫河州定羌驛丞與曳就道天順元
年 英宗復位自定羌驛丞召還爲大理寺左少卿時母服未
闋聞外艱以情自陳 命賜祭營葬蓋特賜也服闋請調南京
大理寺五年陞南京禮部右侍郎七年調南京刑部詳刑部
俞綱字宗立浙江嘉興府嘉興縣人寓籍上元爲諸生改隸順
天正統元年舉楷書修 宣廟實錄三年授中書舍人六年
郕王受封簡輔導 詔綱侍講歷審理正爲人和愿縝密無疾言
遽色稱爲長厚君子十四年 郕王卽位九月以輔導恩陞太
僕寺卿十二月進兵部右侍郎入內閣元年侍經筵三月命出

理部事景泰二年陞兵部左侍郎雖戎務非其所諳以千少保掌部綱亦謹身率職三年易儲加太子少保仍兼原職天順元年調南京戶部左侍郎六月改南京兵部七年改南京禮部左侍郎掌部事成化三年致仕

倪謙詳本部尚書成化三年任本部右侍郎四年劾免五年復任

李本詳本部尚書成化十二年任本部右侍郎十三年掌部事尹直江西泰和人景泰甲戌進士成化二十年任禮部左侍郎後入閣詳內閣

侯瓚字奉璋直隸保定府雄縣人景泰甲戌進士授戶部主事

天順中陞戶部員外郎成化二年陞鳳翔知府八年陞山西右叅政十七年陞光祿寺卿二十一年陞巡撫甘肅僉都二十二年年歷兵部右侍郎本年改南京禮部右侍郎在任未有顯績而朴直坦夷亦無他腸二十三年改南京戶部右侍郎歷南京工兵二部尚書詳南京兵部

萬翼字 四川眉州人內閣少師安之子也天順丁丑進士由禮部儀制司主事成化十年任南京右通政累官南京兵部右侍郎成化二十三年掌南京禮部事詳南京兵部

徐瓊字時庸號東谷江西金谿縣人天順丁丑進士及第第二名授翰林院編修明年戊寅與修大明一統志五年志成蒙賞

賚尋丁憂八年起復補編修會憲宗御極與修英宗實錄
成化三年丁亥實錄成以纂修校正功陞侍讀尋典應天鄉試
十三年秩滿陞南京翰林院侍讀學士掌院事二十三年南京
國子監缺祭酒以年勞陞南京太常寺卿掌國子監事待諸生
以恩義但在監時無所建明人以行宦少之弘治壬午陞南京
禮部右侍郎值黎文僖公淳爲尚書同年及第又同官留務清
簡朝夕切劘以題咏相賡酬六年召爲禮部左侍郎詳禮部
董越字尚矩江西贛州府寧都縣人成化己丑進士及第第二
授編修十五年轉侍讀甲辰二十年選侍東宮講讀充經筵
講官弘治改元遷右庶子兼侍讀孝宗登極詔使朝鮮宣布

德意鄰其饋遺有賦以紀其國弘治三年預修憲廟實錄成
陞太常寺少卿兼侍讀學士充日講官六年擢南京禮部右侍
郎十二年陞南京工部尚書詳南京工部

李傑字世賢直隸蘇州府常熟縣人成化丙戌進士選庶吉士
授編修十三年轉侍讀乙巳充東宮講讀官遷侍讀學士弘
治元年遷左庶子仍兼前職辛亥陞南京國子監祭酒守制八
年服闋改太常寺卿兼侍讀學士掌院事庚申擢南京禮部右
侍郎正德十五年改禮部右侍郎詳禮部

馬廷用字良佐四川順慶府西充人由鄉舉入胄監大學士丘
濬時爲祭酒季試諸生太加稱賞名遂大振登成化戊戌進士

改庶吉士授編修丁未轉侍讀充經筵官弘治乙卯典順天鄉試預修大明會典丁巳進侍讀學士掌南京翰林院事十五年陞南京禮部右侍郎正德四年致仕卒贈南京禮部尚書廷用敦朴樂易所在鯁介臨事能斷在南京嘗攝戶部會江北大饑流民渡江就食者相屬獨特議餐廩不俟奏請所全活甚衆外守備官與太常議不合判數語立決爲詩文亦華贍久居散地勇于求退士論多之

劉忠見本部尚書正德二年任本部侍郎

王綸字

山東濟南府濱州人成化丁未進士正德四年任

本部右侍郎本年調都察院右副都御史巡撫大同詳大同巡

撫

常麟字

浙江嘉興府嘉興縣人成化辛丑進士授兵部主

事歷員外郎郎中弘治十三年陞河南右叅政十四年陞

右布政使正德四年陞應天府府尹本年陞南京禮部右侍郎

居官無善政以附權陞遷六年降山西右叅政尋令致仕

吳儼詳本部尚書正德六年任本部右侍郎

楊旦字晉叔福建建寧府建安縣人弘治庚戌登進士授吏部

驗封司主事卽見重於太宰三原王公恕丙辰陞考功司員外

郎已未陞稽勲司郎中辛酉轉考功風采剛方品藻精確兩秉

述職之衡黜陟惟允甲子陞太僕寺少卿乙丑改太常寺正德

丙寅乞恩歸省蒙路費寶鑑之賜丁卯起復逆瑾欲一要見
卒不見遂以違限例出知於溫務極奸藁治之不遺力郡以大
治庚午起爲浙江副使督學政校士允愜公議若拔寧波生員
余本竟廷試及第至今浙江士夫猶服其精鑒辛未起爲應天
府丞尋進尹順天順天素號繁劇難治治竟就緒壬申陞南京
禮部右侍郎嘗攝國子監事士心歸之時武宗在位已十餘
年矣而皇儲未建乃與司馬經川張公濂宗伯白岩喬公序
議請擇宗室之賢者育于宮中以繫天心公忻然會九卿
具疏以請上雖不果行人稱其忠尋轉禮部右侍郎掌太常
寺事累官吏部尚書詳吏部

楊廉詳本部尚書正德十年任本部右侍郎

王瓚字思獻浙江温州府永嘉縣人博學雄文下筆數千言不
滯弘治丙辰進士第二授翰林院編修十三年丁憂十六年補
原職正德二年陞本院侍讀三年陞國子監司業五年陞南京
國子監祭酒六年南京禮部移文本監撰述慶賀皇上尊
慈聖康壽太皇太后慈壽皇太后表文瓚以非奉旨意不敢

撰述答之部復查有成化二十三年舊規本監乃與南京翰林
院公同撰述八年改國子監祭酒爲人坦直未嘗斂怨北監諸
生愛戴之十一年陞禮部右侍郎十二年陞禮部左侍郎十六
年以議大禮調南京禮部左侍郎嘉靖元年丁憂卒贈禮部尚

書

汪偉字器之江西廣信府弋陽縣人禮部尚書汪俊弟也弘治丙辰進士改庶吉士十一年授翰林院檢討十三年丁憂十六年補原職正德四年補南京禮部儀制司主事本年丁憂八年補檢討本年陞南京國子監司業十三年陞祭酒嘉靖元年陞南京禮部右侍郎二年改南京吏部右侍郎三年改禮部未任遷吏部右侍郎詳吏部

劉瑞字德符四川成都府內江縣人生而穎異十歲能詩文父時教歷山西僉事鍾愛之爲作五清書舍期以聖賢之學因號五清主人云時山東提學楊公瑯嘗集諸同寮于試之特賞其

不凡未幾僉事公卒貧無以爲歛寮案賻之廼克西還應成化
丙午鄉試初擬發解監臨官以其儒士貢第六逮揭榜設宴禮
之與解元等人傳丙午六魁云舉丙辰進士讀書翰林三載授
檢討弘治己未清寧宮災下詔求言上疏論彌災之端有
人曰崇實德親儒臣嚴近習全孝思旌直言勵士風畏小民御
戎狄疏人孝宗嘉納所論直言如副使楊茂元郎中王雲鳳
雖已貶謫遂不次遷擢瑞之力也庚申北虜犯邊復上疏云虜
人有必勝之機而我師無可當之勢宜下求才之詔作賞罰
之權別用人之等定戰守之計時論韙之是歲重修闕里廟成
詔故少師西崖李公祭告因獻議欲更定先師封謚卒不果行壬

戊同考會試所取多名士楊果何景明其尤著者與修通鑑纂
要充經筵官有白金綰鈔之賜又嘗分獻大學皆殊遇也正德
丙寅武宗卽位上疏乞端治本以光繼述一曰隆孝德二曰
求聖學三曰勤宣召四曰嚴責任五曰擢名望六曰明賞罰七
曰抑僥倖八曰絕異端九曰禁澆俗名望如祭酒章公懋吏侍
王公鏊都憲林公俊雍公恭皆先後起用從其言也丁卯逆豎
劉瑾擅權亂政毒虐縉紳嘗言事者咸得罪瑞知不免卽上章
謝病旣出京之明日瑾矯詔斥大學士劉公健而下賢士大
夫凡五十三人爲朋黨勒令致仕瑞與焉瑞聞之恬然恐驚母
田淑人不敢告旣而田淑人知之曰而母以吾老爲憂瑞奉母

行沿浙江沂鄱湖風逆幾覆舟亟以肩輿載母隨陸途行渡長沙江暮雨愁油草鋪無從者假輿人糧待母達旦作油草歌歎已之累艱也由常德至澧田淑人女兒卽南京兵部尚書李公充嗣之母在焉適歲暮峽險田淑人不欲歸遂依李公居之李公以田數畝助其饔飧之資時逆瑾憾不已會都憲雍公忝忤瑾除名謂瑞嘗薦雍罰米二百石輸大同坐是益貧養親樂道裕如也時太和陳鳳梧視學湖南檄諸郡邑士子從講學四方聞風而來者甚衆臨江蔡潮繼提學因以州後閒舍更爲澧蘭書院延講授其中後鳳梧叅政湖藩復檄辰守戴敏創崇正書院請主之荆辰之士多造焉壬申正月丁田淑人憂五月詔

起爲山西按察副使提督學政以制弗行服闋乙亥改浙江提學副使以復古明道爲已任其造士先德行而後文藝有一行者必旌以廩食若行檢虧缺文雖工必黜於是士知向風人文未振遂定冠婚喪祭鄉飲鄉射之儀著名宦鄉賢之祀教廟廷釋奠歌舞之節而風化丕變矣部使者交章薦之將有顯擢適寧藩不軌鎮守者潛通逆謀浙民洶洶與巡按暨藩伯共定捍守之策民恃以安已卯冬陞南京太僕寺少卿上疏乞休不允時寺卿他出瑞署寺馬政久弊檄屬郡戒陪尅禁姦豪憫貧弱故有牧場在著令歲久侵于豪民瑞復之有盜鬻馬者抵之法馬政爲之一新辛巳今上入繼大統又請致仕弗許是冬

遷南京光祿寺卿與中官雜處弊端百出瑞痛革之復上疏釐正其事請著爲令且疏薦屬官之廉能者三人於是中官斂手而屬吏人人思勵民有侵光祿錢入繫於獄者死將半產不足以償瑞憐之爲奏釋其未死者七人癸未四月進南京太常寺卿瑞爲神樂觀樂舞生未有代耕之資奏乞以道童例納銀者免其赴京以其銀畀樂舞生爲糧直從之八月進南京禮部侍郎是冬地震雷電雨雪交作甲申元日地再震水旱疫癘江南北人相食瑞憂之條六事以進曰多發帑藏曰嚴督逋賦曰督察賑濟曰修祭告曰謹戎備曰端大本言甚剴切云時大禮議起大臣暨侍從臺諫部屬以辯諫下獄謫罷者殆數十人瑞

將率留都九卿諍之或爲之危瑞曰吾備位大臣且禮官也不敢爲首領計遂草疏極論帝皇受命受終之道大宗小宗之義及漢唐宋以來入繼大統之典據經援史凡數千言時議禮主正論者凡九百餘疏惟瑞之言簡明深切上雖未盡從而亦不之罪也其卒之日晨尚入部視事既退食於家俄而疾作入書齋端坐而逝享年六十有五性至孝蚤孤事田淑人孝敬備至旣歿哭踊幾絕哀毀踰禮歸塋經萬流驛遇風舟人錯愕瑞焚香籲天風卽止人以爲孝感所致忌日追奠尤極哀痛家廟時祭齋戒必誠牲醴必豐潔纖息一遵於禮宦遊數千里必載冰庄以行蓋近世士夫所鮮及者其事君如事親隨事建白言

無不盡坐朋黨久廢氣不少挫其居官惟法是守有干謁者輒峻拒之聞族人物故必爲位而哭持服視禮爲隆殺嘗畜內弟及族兄仲奇之女皆爲笄字如已出蜀有劉雄者嘗爲校官以憂去服闋赴選部客死殘貧不能歸爲作書示沿途有力者引便是孤兒寡婦船語聞者感動殘卒賴之初僉事公在刑部貸李姓者千金弗及償瑞訪李之妻倍數歸之不受後舉進士復訪得其子竟昇焉陸東臯歿家貧謁其墓爲文哭之出俸金二鎰爲其夫人塋具以米二十石給其家滁生蕭惠溺水死瑞廩其父滁人稱之遇物甚誠心口一致聞人之善好之不啻已出不學無行者疾之如讐以是寡合於人所契合者惟當代名公

數人而已學以程朱爲正脉以居敬存誠爲本以窮理致知爲
要病世之以心學名者空自大而卒沈於禪也故操存嚴密德
器深厚平居無戲言情色雖退食必冠帶終日未嘗傾倚食無
兼味衣無鮮綺尤寡嗜慾室無嬖妾與汪淑人處相敬如賓學
甚博積書數萬卷口誦手披無斯須廢至老而彌篤雖刑名度
數邊情民隱靡不周知維痛絕佛老異端之說每遇 國有齋
醺輒疏諫止其督學及在禮部禁約尤嚴作文以孟子史遷昌
黎六一南豐爲法詩宗漢魏李杜而其要必本諸六經不爲浮
靡險怪之說所著有續漢書改本重觀錄幼學稿數納稿禁垣
奏稿澧蘭錄講習錄并雜文古今體詩若干卷藏於家

趙永字爾錫直隸鳳陽府臨淮縣人長陵衛軍籍寄養順天府
學沉靜簡默博洽淵冲從大學士李文正學文正曰此子風骨
不凡而造詣宏博遠到之才也登壬戌進士授翰林編修纂修
實錄忤逆瑾欲左遷銓部疏勤慎竟復職瑾終術之永裕如
也辛未甲戌兩主會試文衡崇雅黜浮文體復古授侍讀轉春
坊太子右諭德充經筵講官奉 命主武舉 武廟南狩以
居守有勞 賜金麟服陞國子監祭酒兼建師模嚴飭士習抑
請託進廉節動遵矩範不阿權要海內嚮風翕然丕變 世廟
登極仍命直經筵兼日講官每進講必先焚香閉戶積誠滌慮
以冀感通 駕幸太學賜坐講尚書大禹謨敷陳剴切進止雍

容 上屢注目罷講 聖諭褒獎冀日率諸生表謝 上賜勅
及彩幣二襲仍賜宴寵異偶因疾在告 上念講官無直諫者
遣鴻臚寺賞 旨至臥榻諭起供職永感恩流涕力疾入謝未
幾復以言忤當路辭解日講轉南京禮部右侍郎尋攝部篆永
修禮敦俗風化一新時內閣缺輔臣永負時望大學士楊一清
恐相遇不合佯以他意挑之永曰吾可以纓冕挽吾道乎且疏
乞休隱居都下不出戶庭都給事中董進第御史王瑛率諫垣
臺臣薦永名重玉堂化覃壁水退居於輦轂之下而踪跡愈幽
充養乎經濟之才而聲猷實富吏部亦曾疏起永竟不出築精
舍數椽綠以筠檜橫琴抱膝若將終身嘉靖戊申卒於家壽八

十所著有類菴稿文華講義南京錄瀛洲詩北歸稿

顧清詳本部尚書嘉靖六年任本部右侍郎

黃綰字

浙江台州府黃岩縣人正德五年由官生授後府

都事七年養病嘉靖元年行取陞南京都察院經歷五年陞南京營繕司員外郎本年致仕六年行取光祿寺少卿本年陞大理寺左少卿尋陞少詹事兼侍講學士七年陞詹事仍兼學士本年陞南京禮部侍郎十二年陞禮部左侍郎十四年丁憂十八年起本部尚書往諭安南未任閑住詳禮部

林文俊字汝英福建福州府莆田縣人正德辛未進士改翰林院庶吉士八年授編修十年丁憂十三年再任十五年丁憂嘉

靖二年再任四年陞右春坊右贊善九年陞南京國子監祭酒
十一年改國子監祭酒十三年陞南京禮部右侍郎十四年改
南京吏部右侍郎十五年卒於官贈南京禮部尚書謚文修詳
南京吏部

費來字子和江西廣信府鉛山縣人正德辛未進士嘉靖十四
年任詳禮部

呂柟字仲木陝西西安府高陵縣人生而敦厚穎敏少失母哀
毀如成人未總角輒有志聖賢之道不爲詞章之習乃復居矮
屋衣冠危坐雖炎日爍金不出戶限至於冬月祁寒則履籍麥
草誦讀六經恒夜以繼日弘治辛酉舉鄉薦正德戊辰會試第

未及廷對賜進士及第第一名授翰林院修撰樞朴靜端約
力學慕古時逆瑾用事輒以樞鄉人欲引啗之驟與卿佐且援
先朝故事得入內閣樞遜避不與來往託養病去之瑾憾甚欲
中傷之會五年瑾敗得已復任九年請告歸嘉靖元年復除修
撰三年議大禮下詔獄降解州判官六年陞考功司郎中九年
陞南京尚寶司卿十三年陞南京太常寺少卿十四年陞國子
監祭酒樞篤實率人勤於誨迪每有條約動遵古義經書子史
博讀詳玩並有發揮門下環向請益耳聽口授無倦容無擇言
十五年陞南京禮部侍郎十八年致仕二十年卒於家樞學務
實踐不侈詞華居官所在以名檢自礪後有得三原榆次安陽

林縣陝州河內同志諸友於京師益相與規過輔仁博文以致知約禮以力行久之踐履篤實晬晬外著蓋不知夫富貴之可淫貧賤之可移威武之可屈矣故自及第以至宗伯皆視如固陋及志有未行見幾而作則舍車而徒飯糗茹草若將終身其在朝廷野隨寓盡道故所在有勲皆可紀述其因事進諫皆堯舜之道仁義之言非迂非腐足可施行其微而至於一舉一止一語一默未嘗偷惰苟且以至離道故縉紳學者親就以為師表其訓釋經籍必以心求心以道合道以經什經故多躬行心得之言有程朱所未發者故所至學徒雲集聽者心醉知孔顏正脉所在而談淫邪遁之辭不足聽聞其發為文詞則仁義

華顏情孔思而天德之純王道之懿有非遷固以來文士辭客
所能測者嘉靖壬寅卒所著有涇野文習詩習內篇外篇史館
獻納南省奏稿四書因問周易說翼尚書說要毛詩說序春秋
說志禮問史約宋四子抄釋寒暑經圖解魏氏族譜宋氏族譜
渭陽公集外詩上陵詩賦曲頌監規發明著解文移高陽縣志
解州志義勇武安王集詩樂圖譜

崔銑字子鍾更字仲鳧河南彰德府安陽人父陞仕至叅政廉
靖有聞母李淑人之娠也芝產門闥及兩月蛟龍驚寤而生啼
聲洪亮風骨岐嶷見者異之五歲口占成誦十歲從父延安通
四書毛詩能文章明年從諸儒官游博極羣書年十五講太極

圖通周易能筮弘治戊午年舉於鄉庚申入大學祭酒謝鐸歷試
稱首大奇之壬戌會試又不利乃與三原秦偉馬理高陵呂柟
榆次寇天敘林慮馬卿同邑張氏隆相友約明經修行毋慕高
虛毋溺誨詁毋耽詞章毋蹈利名其志毅然以洙泗爲師乙丑
舉進士改翰林庶吉士正德丁卯授編修預校實錄戊辰會試
爲同考官執欲私其子以託銑銑不可竟出他手時閣瑾竊政
因戍元老奴僕端搢銑與修撰何塘見瑾長揖而已瑾怒謂其
黨吏部尚書張綏曰翰林白面後生輕薄如崔銑尤甚欲重罪
之綏不可塘謂曰吾兩人不可易節對曰銑安義命久矣是歲
實錄成瑾僞傳上言史臣未練政體各陞俸一級調部滿州

縣銑改南京吏部驗封司主事部歲儲縱糧長易美惡銑廉出
之糧長賂請權貴固執不可尚書謂曰爾謫僊也何苦爲此對
曰何勤非忠孰忠非分竟格姦庚午瑾誅召還史館辛未會
試再爲同考時輔臣治文藝銑上書勸以及時悟主救民薦
賢理財強兵毋事瑣末懇懇千餘言癸丑冊封周藩歸卻厚餽
便道歸省甲戌還京掌廷試卷充經筵展書會講官有故故
代之御史王廷相下獄瀕死亟請執政曲抹出之丙子經筵講
說官啓上以擇相輔德納誨去讒頑戒逸豫時權倖錢寧錢
安廖鵬在側大呵之各歷三考晉侍讀丁丑春罷經筵引疾求
去少傅梁儲素重銑固留之乃三爲會試同考事竣得歸稱壽

二親時年已八袞矣己卯作後渠書屋董耕授徒刪定二程遺書作郡書世廟卽位輔臣諫官交薦起修武廟實錄以備經筵癸未講論語開陳治本啓沃懇切尋擢南京國子監祭酒諸生相顧曰吾輩得師矣銑開誠心崇正義明教條嚴祀事正文體獎雋彥警輕情禁遊戲清廩餘革蠹耗日衣冠坐東堂諸生朝夕問難銑嚮答不倦周貧佚老問疾賻喪士林大說逸尹梅繩南謫時友也抗瑾奪官貧且卒矣其母自鬻書屋銑分祿以養爲治棺歛先自內書堂中以待受教者厚幣來謁悉卻之甲申議大禮銑抗疏勸上勤聖學辨忠邪以回天變自分必被逮已而報休銑曰天恩蕩覆見老父幸矣諸生愕然如失

怙恃爲文贈曰忠孝兩全出處中道銑不役一夫囊無江南一物惟携古書數篋因自笑曰人言金祭酒我今若水矣公卿及諸生送者千餘人從而渡江者又數人人羣拜潸然涕下銑乘醉登舟歌曰故園菽水知堪養捷徑南山保未曾歸見父愉愉如也日讀書洎上折衷羣言明年喪內不復再處及四方來學者衆銑教以研經飭行曰道在五倫學在治心功在慎獨丙戌罹父艱哀更甚於母時著松窗寤言中庸凡演大學全文又著士翼政議中說考文苑春秋家居十六年初號後渠客有遺泗磬因號少石又定號曰洎野己丑立皇太子上慎選宮寮起銑詹事府少詹事兼翰林院侍讀學士少師夏言政暇過談

夜午忘歸贈句有一字不曾通政府十年始得見先生尋進南
京禮部右侍郎庚子署戶部篆清耗釐弊進賀 萬壽聖節部
例公贖悉拒不受時有風霾之變銑自劾 溫旨慰留冬過家
疾作杜客調攝著讀易餘言辛丑病不克南行議乞休未果病
劇卒年六十四銑博學善談從遊者多所感發門人如吏部郎
中王與齡輩皆日依之不能舍去撫按以訃聞 上遣官治塋
諭祭贈禮部尚書諡文敏所著書多行於世天下學者惟稱曰
後渠先生

國朝列卿紀卷之四十五終